

**Zeitschrift:** Igl Ischi : organ della Romania (Societat de Students Romontschs)  
**Herausgeber:** Romania (Societat de Students Romontschs)  
**Band:** 29 (1942)

**Artikel:** Il pescadur  
**Autor:** Lozza, Alexander  
**DOI:** <https://doi.org/10.5169/seals-881993>

### **Nutzungsbedingungen**

Die ETH-Bibliothek ist die Anbieterin der digitalisierten Zeitschriften. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. [Siehe Rechtliche Hinweise.](#)

### **Conditions d'utilisation**

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. [Voir Informations légales.](#)

### **Terms of use**

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. [See Legal notice.](#)

**Download PDF:** 15.03.2025

**ETH-Bibliothek Zürich, E-Periodica, <https://www.e-periodica.ch>**

## Il pescadur

da P. Alexander Lozza O. C.

Avon onns fuva tier nus la pesca in sport u in mistregn dils parlars! Per in undreivel catschadur fuss ei stau ina dishonor de cuorer tudi suenter l'aua, cun ina torta entamaun ed in pèr liters aua si dies. Star entiras uras sco in tierm, en il medem liug! Quei ei enzatgei per de quels che san buca co mazzar il temps.

Mo cura ch'ins veseva pender vid la corda in bi pesch tarlischont, fagev' ins pli raschuneivlas reflexiuns. — «In bi pesch vala dapli ch' ina magra lieur, e senza percuorer cuolms e vals.» —

Mo quei fuv' ina serenada d' in mument. «Termagliems de metschafadigias per survegnir in pèr raps senza fadigia.»

Pèr ozildi, suenter che scolasts, professers, signurs e spirituals van era a pescar, ei la pesca vegnida en honor. —

Mo in cert plevon astga aunc oz buca leger giud scantschala igl Evangeli: Nus havein luvrau l'entira notg e pegliau nuot.

Aunc oz renfatschan catschadurs a pescadurs: «Per esser in bien catschadur drov' ins spèrt, inschign,

forza, egl, ureglia; mo per esser in bien pescadur eis ei avunda sch' ins ei buns de star sillas combas.»

\* \*  
\*

Il student R. C. lavura vid sia dissertaziun per il doctorat. Quels tutsavieivels fan schiglioc lur dissertaziuns sur de tuts arguments, era ils pli minizius e ridiculs: sur il graun e sur dil zerclen, sur dil crap e sur dil lenn, sur dil rodund e sur dil quader, sur digl esser e sur di buc' esser e. a. v. . .

Ozildi tier la renaschientscha romontscha eis ei moda de rischlar nos maghers praus romontschs.

R. C. raschla ensemen numms romontschs de mistergners. Quei havess de dar ina interessanta dissertaziun. El va da vischnaunca tier vischnaunca, cun ina hazra mappa sut bratsch, e consultescha il pli bugen gliעד veglia.

El ha gia fatg in imposant migliac cun numms de mistregns ed uffecis, civils ed ecclesiastics, naven dil signun entochen tier il papa. — El ha rimnau in entir vocabulari . . . Mo el vul era puntuar las nianzas dils differents numms. Perquei surseglija el buc' ina vischnaunca u vitg egl entir Sur- e Sutses . . .

\* \*  
\*

En ina vischnaunca de Surses vegn el enviaus tier in um vegl. Lez sappi tuts numms imaginabels e pusseivels.

R. C. ei reformaus. El vuless haver ina litania pli correcta dils differents uffecis ecclesiastics catolics.

Mo il vegliet ei in rufinau. El numna ils uffecis e e las dignitads ecclesiasticas sco suonda: Il papa, il cardinal, igl uestg, il canoni, il plevon, il caluster ed il pescadur!

R. C. sesmarveglia ed empiara, tgei sort uffeci quel dil pescadur seigi... Quei uffeci ecclesiastic hagi aunc negin saviu numnar! Senza in' umbriva de fatalitad rispunda il vegliet. «Ti eis reformaus, perquei sas ti buca haver la dretga idea de quei uffeci della gerarchia catolica. Ti stos ver quei cun tes agens eglis... Damaun ei gest dumengia. Neu cun mei en baselgia. Pér leu saiel mussar a ti igl uffeci dil pescadur. Pervia de quei vegn tiu perdicant buc' a magliar en tei.»

Schegie nuidis sto il futur docter suandar il vegl en baselgia.

\* \* \*

R. C. seferma els davos bauns. Il vegliet va viaden, spir dignitad, e seposta el baun davos ils scolars. R. C. spiunescha dapertut, schebein il pescadur vegnessi enzanfa neunavon...

Igl ei perdanonza. Sigl altar stattan era diacon e subdiacon. R. C. patratga: il num de quels dus ha el aunc buca indicau a mi. Forsa che in de quels dus ei il pescadur...

Il predicatur della perdanonza fa in bi, mo scarschentiu liung priedi. R. C. filosofescha: franc ha el manegiau il predicatur. Lez ei il pescadur de carstgauns, entras annunziar il plaid de Diu, suenter



ils plaid de Christus a s. Pieder: da cheu naven vegnas ti ad esser in pescadur de carstgauns . . .

Anetg, enamiez quellas reflexiuns, vesa el co il vegliet, els emprems bauns, aulza ina torta, pressapauc sco la lonscha ded in pescadur, e sbassa quella cun forza sil tgau tschuor d' in buobet . . . «Tloc» aud' ins tochen giudem la baselgia . . .

Il vegl sevolva e mira anavos, sco sch' el vuless encurir enzatgi. Il futur docter sto morder la lieunga, per buca stuer rir dad ault! Ussa ha el viu cun ses agens egls il pescadur . . .

\* \*  
\*

Cura che il vegliet malizius arriva silla portabaselgia, tschaghegna el si per R. C. e di: «Has ussa viu il pescadur? . . . Ti stos saver, che en bein enquala pleiv de Surmir, quel che ha de pertgirar ils affons, vegn numaus il pescadur, «igl pastgeder.»

Schebein il futur docter hagi acceptau ni buca il num de quella dignitad ecclesiastica en sia disertaziun, ei a mi buc enconuschent. . .